

INSUKU ZOKUGCINA

Isigcawu 1

Ndlovu: Ndoda awukuboni ukuthi uphose wangidalela inkemenkeme engango Mzilikazi?

Nkululeko: Ngiyakubona wethu uhlupho bengingazi ukuthi umkakho uyayithinta ifoni yakho.

Ndlovu: Haa yekelela wena, phela " ipassword" yakhona ligama lakhe.(ahleke athalaze indawo_yonke uMbonisi).

Nkululeko: Pho kuzaze kuphethe ngani?, Uthi liyahlupheka yini lina bomathatha lisakhasa(Abobotheke uNkululeko).

Ndlovu: Yikho ngikubizile phela somathe wami, nxa ngilawe ngiphethe wonke amaqhinga, wena phela ungumnvundla, isikhwehle sakoGasa esiphanda umumbu ngonyezi.(Ambuke uMbonisi kuze kuthontele ezibilini zakhe uNkululeko).

Nkululeko: Qhinga bani engingalipha isakhamizi ngiyisigwadi nginje?(Azitshaye isifuba uNkululeko).

Ndlovu: Ngizafonela uNomagugu azohlala kuwe njengentombi yakho, kuzakuthi ke Mina ngibe ngikuvakatshela njengomngane wami kanti nje ngizobona yena.(Abonakale sengathi ulamahlonyana uMbonisi).

Nkululeko: A! A! Umama athini? Phela uzabona omunye kuthiwa kayelala yedwa ethi luthando bani olunjalo?(Akhamise umlonyana wakhe ocijileyo).

Ndlovu: Uzalala laye kodwa alisoze lembathe lonke.

Nkululeko: Kambe? Sivume isihlophokazi sona lesiya?

Ndlovu: Utshiphe njengoZupco ke lowayana, ubona umbala lokundizela phezulu njengamangawuzane, ligabha elingelalutho, angithi livele liyawenza umsindo omangalisayo.

Nkululeko: Lanxa kunjalo iyangisinda indaba le, athi engizwa umkakho umaDube angisize, njengoba evele etsho ukuthi ngikulayela eceleni.

Ndlovu: Ungethuki umfazi umuntu wokuza, phela waletshwa yini kanti njalo ngilelungelo lokumxotsha.

Nkululeko: Uzafela ejele wena ngengqondo yakho yonale.

Ndlovu: Yikho usesaba ukuthatha?, Gwala lendoda leli.

Nkululeko: Ngisakhula wethu, ubude kabuphangwa.(Ahlobise ubuso bakhe).

Ndlovu: Indevu lezo ziyakuhlolela na?

Nkululeko: Yikho ongibizele khona ukuzongihleka ngobunsumbelume?

Ndlovu: Hhatshi mngane bengikubizele uNoma? Uyasivuma isicelo sami?

Nkululeko: Kodwa singangifakisi enkingeni.

Ndlovu: Khululeka ugcwale ibhavu, kade sikwenza lokhu singophunyuka bemphethe.

Nkululeko: Asazi khona umuntu emgatshiya ukuvuthisa eyakhe insimu alande eyemzini?

Ndlovu: Nxa isilugwadule olungavundanga ngithini?

Kulamule yena uMaDube eqhamuka efuqa ibhala evela emfuleni

Nkululeko: Sobonana mbayimbayi ndoda.

Ndlovu: Kulungile awuthi ke ngiyebiyabiya okuyizikhadlana okuvulwe zimbuzi zikaMaNcube.

©Kwanele Khumalo(Mntungwa kaMbulazj)

WhatsApp: 0777332148/ *naisonjunior87@gmail.com*